

MP Bayan Baru kutuk tindakan Alvin Tan persenda azan

Astro Awani

April 22, 2015

Oleh Haider Yutim

KUALA LUMPUR: Ahli Parlimen Bayan Baru, Sim Tze Tzin (PKR) mengutuk tindakan blogger kontroversi, Alvin Tan yang mempersendakan azan dalam sebuah video di laman Facebooknya.

Beliau menyifatkan tindakan itu sebagai satu tindakan ekstremisme kerana ianya bukan hanya menghina umat Islam tetapi menghasut kepada kebencian agama.

"Hakikat bahawa dia telah melakukan perkara begini beberapa kali, hanya membuktikan niat jahatnya. Perbuatan menghasut sebegini serta mencetuskan kebencian antara agama, tiada tempat untuk masyarakat berbilang kaum dan agama.

"Tindakannya juga akan memberi nama buruk kepada golongan bukan Islam (dan menimbulkan persepsi) bahawa orang bukan Islam tidak sensitif terhadap agama Islam.

"Saya perlu menegaskan bahawa majoriti bukan Islam menghormati kesucian Azan dan Islam sebagai sebuah agama," kata Sim dalam satu kenyataan pada Selasa.

Bagaimanapun beliau menyeru masyarakat Islam dan bukan Islam agar bertenang dan tidak terjatuh dalam perangkap golongan ekstremis ini sehingga lupa kepada sikap toleransi antara agama dan kaum.

Alvin dalam posting Facebook terbarunya sekali lagi mempersendakan Islam menerusi sebuah video memaparkan 'azan' versi R&B.

Video berdurasi 2 minit 50 saat itu mengundang kecaman dan kemarahan masyarakat Islam yang rata-ratanya dari Malaysia dengan menyifatkan sendaan itu sebagai kurang ajar dan biadap.

Copyright © Astro Awani Network Sdn. Bhd. 2015 (535275-D). All Rights Reserved.

Source: <http://www.astroawani.com/berita-malaysia/mp-bayan-baru-kutuk-tindakan-alvin-tan-persenda-azan-58386>